

湖海樓全集



湖海樓詩集卷第四

七言古

邑後學任光奇重校

詠史倣李西涯新樂府三首

王公怨

責謝朓也王敬則女爲朓妻朓告敬則反後朓爲江祐構害歎曰天道其不昧

乎我雖不殺王公王公因我而死

射陽王公奈爾何領軍細鎧嬌馬馱老夫善爲拍張戲

兒曹彈作懊儂歌懊儂歌猶在口東牀快婿好身手一

紙南徐告變書歸來難見紅顏婦可惜蕃房賦彩牋藁

砧爾是何雞狗婦欲報仇仇未得江家尉羅橫相索御

史中丞收獄來王家肉枿生顏色人生嫁女莫如此有

女莫飲謝家水梁朝公主花不如負心肯守卿家子

梁武

第二女永世公主先適眇子謨後更以與王志子謹

蕭鸞誤

悲王融也齊武崩融欲立竟陵王子良為蕭鸞所遏鬱林即位十餘日收融於

獄尋

賜死

是何年少稱王融絳衫戎服真英雄開口欲解穰侯印

作人擬立博陸功元長名譽差不惡誰歟傖父沈昭畧

可憐舉事一不當獄吏居然來撈掠搔頭弄姿誣李固

官家拍手大笑樂曲水序文亦好雲龍門悔不蚤囚欲

不言心自擣囚欲一言奈母老

赤章奏

刺沈約也梁武受禪約於懷中出詔書後因病夢齊和帝劍斷其舌乃呼道士

奏赤章於天稱禪
代之事不由已出

銀箏須炙酒須煖齊朝梁朝君莫管仕宦當學沈休文
不然衣帶日趨緩君不見太子青宮初啟時翩翩陪從
亦堪思一朝密語壽光閣雲龍變化非常兒范雲來沈
約出徘徊宮門真可惜赤章一夜飛上天帶孔頻移更
何益雕闌玉砌一番新離宮侍讌不勝春誰識坐中家
令在相看還是舊宮人

東門行

秦家兒兄弟同日封
股療母疾詩以紀之

出東門車輪摧停車一躊躇乃聞道傍嘖嘖秦家兒

解一

秦家兒一何奇母病連年累月里中之人皆言不能治

解二不能治故左手搯臂肉剗以短刀持作糜解三阿弟自

外歸頭多瘡茄面目多黧適見厨前有刀釜有糜持刀

雪涕前致辭將糜雜肉繚繞之解四不見東家年少兒母

病不救吹笙篴不見西家年少兒母病不救吹笙篴解五

秦家兒一何奇短刀是何物以刀剗股甘如飴兄剗弟

不察弟剗兄不知兄肥弟瘦爭一時東門行試歌之家秦

以下
爲趨

行路難六首

握手復悲歌生年三十當奈何人生如樹花之開謝又如白日之經過庾徐潘陸不稱意金張趙馬何其多鉅

鹿公主青牛車秣陽小侯紅兒韉我今不樂見此物脫
身直上城南陂歌夜黃舞來羅生年三十當奈何

誰何明鏡名盤龍乃是洛陽良工之所造帶繡七十二
雙之鴛鴦鐻以金筒薰鵲腦置向瑣窗前蛾眉對君掃
絕代紅顏亦枉然他人不羨自云好君不見女兒作人
良復難象牀繡被終朝單東隣小姑身早貴兩家健婿
已得官寄語女兒勿太息我作男兒亦何益箜篌須鼓
箏須拍綠蟻爲君浮一石區區復區區細事慎莫填胸
臆

布衣落拓善詞賦家在金陵縣前住金陵縣前多貴游

香車寶馬工細步我昨出東門道上與之遇平頭奴子
白玉箱掉却金鞭不肯顧傍問車中人知是舊時貧賤
交故人憔悴君所鄙安能望君珊瑚九子之珠旃憶昔
寒閨結納時故人爲漆君爲膠我但吹簫自得食不樂
伺君囁嚅渙忽之顏色君不見范雲與江祐歡好通心
腸一朝貴賤異分手莫徬徨還君懷中金剪刀我今塗
泥君鳳凰

旦日大作樂擣菹中尉宅坐下西曲之名倡坐上南朝
之狎客絳蠟如山徹夜燃二十四枝金穗麥誰歟擊鼓
半綵衣傍有鈿箏夜深擘五更窈窕梨花掖行遍綠錢

曉無迹銅丸輕落繡瓦中三尺屏風遮不得酒酣自作
輕薄篇金鵝細管吹向天忽逢老翁提袂至責我作事
何輕猥拍手語老翁我今倒行逆施殊可憐衛玠一生
原善疾謝莊家世本無年

仙人王子喬遺我一丸藥白玉爲刀圭丹霞爲橐籥令
我服之大笑樂下騎赤鯉上黃鶴矯首語神仙天上亦
可憐姬人空擣寄生草纖手何須姹女錢秦皇漢武誰
復在少君樂大死道邊若云天上果有埋愁處奚事吹
簫之女反下天

奪君手中白團扇寫作長歌短歌徧歌題名曰行路難

昔日王筠鮑照之所撰書君紈扇君不知但用金犢轅
中行障面道逢秦韓娥見此歌憐我音節斷續何其多
歌之曼聲一日夜美人羅袖淚雙下美人但問作歌人
此人淪落殊苦辛願令此歌譜入石城樂石城童謠差
不惡

江南曲

來時歡乘秋風來去時歡乘春風去妾夢還遲灞岸雲
君身已拂垂楊絮君今遠別到襄陽襄陽二月春花香
還君昔日九華扇歸妾曩年七寶璫白檀畏向金猊熱
斗帳微寒心斷絕圓浪蘋花素似羅石壇琪樹明如雪

綠帆霏微春水濺聞君愛住真珠船東風江鯉搖紅尾
莫惜傳書到枕邊

徐郎曲

江淮國工亦何限徐郎十五天下奇一聲兩聲秋雁叫
千縷萬縷春蠶絲滌除胸臆忽然妙檢點腰身無不爲
高才刳曲驚莫敵細心入破真吾師徐郎醉汝一杯酒
汝醉還能作歌否請爲江南曲一唱江南春江南可憐
復可憶就中僕是江南人憶昔江南夜三五謝家兒郎
健如虎結髮平翻烏角鹽當窗濫作善才舞此日當歌
便瘦生此時善舞便相迎知音自是緣門第識曲由來

擅姓名十里倡樓留更住三更街鼓得人情霍王小女
家家瑟楊氏諸姨部部箏二十年來事沾臆南園北館
生荆棘崔九堂前只獨憐奉誠園內無相識琵琶斜抱
恰當胸細說關山恨幾重南曲不傳張伯起北宮誰數
沈君庸霜天禿髮那堪摘寒夜單衫只自縫暗裏漫尋
前度曲人前不認舊時容誰知老大不自得却向徐郎
敘疇昔疇昔烟花不可親徐郎一曲好橫陳干卿何事
馮延已錯譜悲涼感路人歌罷誰人擊鼉鼓十萬銀燈
落如雨前輩徐郎慎勿輕君不見陳九白頭渾脫舞

陳九

徐郎教
師也

楊枝曲

人生花月不常有眼前況見青青柳人生離別將奈何
可憐復唱楊枝歌僕本傷心人闌入揚州路風流前輩
馬扶風後堂絲管留髡住婆娑門舞白翎雀開元弟子
黃幡綽緩舞珊珊屏後來嬌歌嫋嫋燈前落就中誰更
得人情弱質輕軀近長成詢來知是楊家子我取楊枝
作小名麴塵灑徧黃金熨和煙和雨窗前拂文通久號
斷腸人楊枝爾更銷魂物楊枝楊枝難重陳與爾相依
春復春永豐坊裏誰栽汝京兆街邊最綰人我作楊枝
歌一爲楊枝譜半植深宮半道傍古來只有楊枝苦細

說楊枝誰最都御溝西望翠模糊樓來興慶池中鳥藏
得昭陽殿裏烏高樓更憶名花萼楊枝此地偏飄泊公
子堤前籠玉鞭美人樓上褰珠箔愁人最恨是離亭送
客楊枝二月青顰罷蛾眉君不見吹殘玉笛舊曾聽驚
心猶是春江渡鵝黃染就渾無數贏得榆錢號沈充那
堪柳色如張緒楊枝楊枝勿復嗟爾今生長在侯家教
得琵琶蒙主惜唱成穆護有人誇我今亦是白楊樹十
圍擁腫心空處雨打風吹祇自憐長條短葉攔官路

長干行

長干樓殿映丹霞大道笙簫十萬家朱雀長江限南北

華清大內擅煙花落紅還向金溝出春風一去無回日
欲問昭陽歡笑時爲聽頭白宮娥述龍帆鳳舶渡江來
碧殿朱旗日下開可惜西京翡翠苑應嗟南國鳳凰臺
三軍縞素丹陽市十萬哀聲沸江水一時庭論譽朱虛
比來門戶繇良姊石頭花鳥倍風光不記銅駝事可傷
宮中遂起芙蓉舍市上疑成白玉堂新亭墮淚悲王導
揚州藩鎮皆羣盜爾日鶯啼太液池比來花滿長安道
五侯七貴似神仙置酒更衣韋曲天廬兒作使彈箏伎
別騎分催博進錢寶嬰石顯通賓客飛書告密黃門札
山頭廷尉幾通侯複壁居間誰大俠虎圈熊館接長楸

蹴鞠彈碁夜未休外舍弄田矜意氣大家好時騁風流
沉沉永巷遲銀箭玉車早幸平陽宴下杜梨花豔御衣
回中芳草迷宮扇遂逐靈芸掌上身鄴都千里起香塵
雖然樊姬能辭令惆悵披香博士人吳娥越豔盈三閣
校尉西園還大索紅樓七十二鴛鴦君王左顧終靡樂
故劍淒涼許嗇夫春深柘館痛啼鳥已怨竇姬輸織室
更愁赫蹏偉能書中宮落葉虛無主呆恩鈎弋嬌眉嫵
濯龍門外馬如龍平樂坊中花解語只有先皇金井鴉
朝朝莫莫恨窗紗君王不念長安月也應微憶洛陽花
洛陽花下可憐子此是君王舊宅裏朱邸將無怨綺羅

黑山豈料傷桃李莫將舊事怨黃巾劉季還分太上華
寧見掖庭悲覆醢微聞閭巷爲沾纓秋月春花俱可惜
韶華欲挽眞無策羯鼓纔從馳道紅宮車已向斜陽碧
杜鵑啼血一春寒燕子香泥尙未乾陳家叔寶知同怨
猶是西宮賈佩蘭孝陵寂寞松楸冷金鳬銀雁埋荒井
不見桃花照玉牀空餘明月輝銀綆碧闌干外落秋槐
誰是江南庾信哀惟有紅牆雙蛺蝶和愁和雨逐人來

酬許元錫

嘉隆以後論文筆天下健者陳華亭梅村先生住婁上
斟酌元化追精靈憶昔我生十四五初生黃犢健如虎

華亭歎我骨格奇教我歌詩作樂府二十以外出入愁
飄然竟從梅村遊先生呼我老龍子半醉披我赤霜裘
此生闌入銅駝路可憐老作江南賦頭上不畏咸陽王
眼前只認丁都護晚交許子懷抱開看爾不合長悲哀
手提一詩來贈我十幅錯落紅玫瑰我年三十餘清狂
愛兒戲旁人見我笑不休安知我有填膺事日間擊鼓
夜擊鮮行樂安得千萬年何肯齷齪學章句三日新婦
殊可憐許子贈詩踰一月念欲報之久不發昨宵飽看
冒家燈一寸管城老龍渴掀髯狂作許生歌食紙春蠶
響不歇明朝歸客正揚舫海色蒼茫青更青